

四庫全書

集部

欽定四庫全書

集部
桂隱詩集卷一

詳校官中書臣 閔思毅

侍讀臣 孫球覆勘

總校官進士臣 朱鈐

校對官中書臣 王鍾泰

騰錄監生臣 劉田

欽定四庫全書

桂隱詩集卷一

元 劉詵 撰

古體 五言

感興五首

昔在唐虞時萬象昭白日聖人垂龍衣巖殿吹鳳律朱
草聯階生景星當戶出羣賢布天下野穀盡嘉實嗟哉
戰國交九寓淪斧錯糟糠委仁義軒蓋寵權術孟軻起
驅馳白髮颯垂軾空餘七篇書千載資嘆息

姬室逸其御天下皆兵交楚武首僭王名器從此淆仲
父佐伯業仗義何嘒嘒正辭削其僭王綱可復昭奈何
舍其近遠問南舟膠堂堂匡周師其得僅一茅所以魯
仲尼加之器小嘲良會不再得誰能遏秦嶠

秦人燔詩書聖道散若煙宮殿干斗極東遊問神仙漢
祖祠孔子遂為百代先大哉禮樂意所見何卓然因勢
導其趨勇赴如決川但憾羣臣間餘習猶橐鞬良平雖
善慮不在三代前安得豁達資一見賈少年

金張貴朝廷衛霍列茅社奴隸凌虹霓親戚折五伯鬪
雞馳鄩杜射虎宿滄瀟意氣驕盛時咳唾有光價相如
滌器夫萬里乘駟馬買臣最微賤懷綬出邸舍賢愚何
必齊時至俱氣化豈無單練士叩角五陵夜太史重成
名寂寞千秋下

我我蓬萊山白玉為洞房仙人雲霧衣侍女冰雪妝丹
霞縹緲中往來皆鳳凰借問羣仙人何者為秦皇羣仙
顧我笑振袂凌風翔我有金鼎丹鍊之踰千霜相期息

金定四庫全書
卷一
瑤樹歲晚何渺茫吾聞仙人家美酒如瓊漿長生所願
求得醉亦可償

春寒閒居五首

貧居託幽巷久雨客來絕春寒霰時集淅瀝在高葉鳥
鳴日已晏寂寂茶鼎歇慙無晁氏智懶事主父謁閉門
自讀書庶以勵高節

瀟瀟山城雨撼撼書館風喔喔鄰屋雞迢迢遠方鐘遐
思在古人展轉魂夢通抱拙俗所棄歲晚將誰同賦成

不輕賣金盡當恐窮

久寒卉木絕初旭陰翳謝春淺有令姿澹澹在平野山
明孤烟發天迴一鳥下積憂鮮曠懷怡詠聊此暇賦詩
勿鏤刻養生師叔夜

昔時如花人今見兀若株華滋散安在嗜好豈不殊河
水不灌翳春風不歸枯聞道須少日立功無暮途

西里夜圍燭東鄰朝玩山相視無羨心豐約自不關芳
草滿幽庭日晏人未還久陰忽微暄孤禽語花間

吳寧極惠和閒居五詩復用韻為謝

嗜澹鶩墳素端居世機絕微風被崇梢撩亂書幾葉山
家晨烟薄日晏遠春歇庭寒揜餘蕙剝啄謝過謁幽懷
忽浩然高詠脫音節

衰髮如素雪一往隨飄風悵然平生懷危坐聞遠鐘守
身易成隘應俗或謂通不惜舉世稀所慕知者同彷徨
豈有求寂默非傷窮

文章在天地萬古相遞謝風霆春行天鷗隼秋縱野所

得雖良殊自役總無暇飛霜厲薄寒木葉日以下咫尺
不共論孤燈結遙夜

以我砭砭器報君珊瑚株至寶非可酬但表心不殊石
賤貴能固寶潤知難枯人生在有合醜好豈一途

王屋起代北荆江出岷山苞流各自立皆與元氣關此
理誰復知神禹去不還不知諒何傷相望天地間

古意三首

古風日以喪交道遂以圯昔時素心人忽若匪知已朝

直蓬萊宮暮宿光祿卽聯騎多季劇填門集金史疑嗔
著天下名德為垢粃古言西施貴衆色失桃李不見秦
張儀卷舌讓蘇子

南方有佳人天質辭紅妝素手映輕雪明璫照羅裳二
月千花開笑語春風香盈盈水晶簾丹雲貫䟽房自倚
絕世姿鬢鬢不能霜秋葉鳴西樓城烏啼夜涼高節良
自固諒不悲年芳

昨日苦大燠酬以今日寒天道極必反人事盛必利剛

柔有迭施消長乘兩端彼美者誰子一生困辛酸日晏
食未炊冬月夜不完著書垂白髮門草秋漫漫天道何
由詰俯仰良自嘆

飲酒有何好

飲酒有何好但取愁可消古人不造酒天地皆是愁劉
阮醉一石我飲三葉蕉當其忘世界畧與劉阮侔人生
量淺深隨分無過求天地倘無愁無酒亦可休

作詩能窮人

作詩能窮人誰能忍不作但見平生愁霏霏筆端落朝
騎孤鳳凰暮駕兩黃鶴手攜王子晉吹笙上寥廓人言
忌太高下筆寧淺弱窮通信有命詩道未可薄

天道勿徒恃

種稻南山邊雨足多稻穗一朝疾風來腐折不可刈東
家不知畊雨粟夜滿地問渠安得之飽食了無愧我欲
廢鉏耰雨粟非可覲人事且自盡天道勿徒恃

夢事安足憑

昔夢驂重華躡霞凌青冥麟鳳羅百供從御皆瓊英既
覺知虛無豈足詳追評封國忽銷印繪功反屠烹戒食
或已忘遺金或悔輕人事尚無據夢事安足憑

客去不可挽

水逝猶可回客去不可挽不惜佳客去但憾聞道遠明
珠買娉婷歌舞供笑莞車馬填門來千金具朝飯子孫
日以驕六籍不掛眼所憂非無客客多良足嘆

金盡還復來

人生百年間金盡還復來惟有少日顏一去不復回不
惜少日去但恐志氣頹古人當少日樹立何崔嵬歌聲
出金石可老不可摧所憂非金盡金多安在哉

山中雜賦六首

壬申

昔出憂雨來今行恐無雨倘蘇八月旱寧受一日苦瀟
瀟涼浥稻稍稍潤入土生物吸流滋如饑得膏乳田家
隔短墻頗亦聞笑語幸收饘粥資筋力庶可補

歲旱千里同萬物多槁枯東鄉早被澤生意回禾蔬西

鄉遂愆期滌滌氣未蘇
皇天豈有私欣悴自爾殊
所以李將軍再拜劉家奴

秋氣日潛變單絺生薄涼
疎雨鳴淅瀝微燈翳空房
少日已嗟老衰年彌獨傷
繁憂委寸緒起坐空彷徨
便有蘇君金何由返流光

道逢誰家墳嗟我起十尺
八柱聳赤銅四階壓文石
幽墻發黛光碧瓦戢鴛翼
生時諒何為功言豈嘗立
一朝棄人世永與所歡隔
光輝在空山於事竟何益
醜好死

未忘可為愚者惜

空山有一婦二十失所天貞心比堅石血淚迸湧泉寒
燈役機杼拾穗裙不完婚男與嫁女辛苦雪滿顛自謂
分當爾節義何足言城中墜孀姬潛好留少年門前立
旌木世人何由傳

我飲本不多興至不可無但憾無美酒旋買山中壺山
中近朴味山外多澆渝飲灰令人病飲敗令人愚寄言
好飲人慎毋以名沽

山中五詠 丙子

蓐食希早出出城日已辰
况憫肩輿勞時亦步嶙峋
嶮苦難步投宿荒村民
啟扉熾燈火延客意頗真
苦辭村無酒無以澆埃塵
歲歉有穉粟尚可分炊
晨高門多吠犬倉卒難
投身勿投高門宿勿厭
村家貧

季秋乃多雨淅瀝終夜
鳴槁枯既已過不足蘇
疲眊庶以沾園蔬聊堪
作冬羹井穴泉稍出始
免汨泥泓王賦雖尚寬
京官督私征府邑奔奉
命斯民敢違程冬羹未

可期何以為吾生

溪橋落白水野路覆紅葉山邊四五家日暮烟火白歸
牛認深巷行客指新月村田旱傷餘老稚筋力竭方今
冬序初饘粥倘未缺雪霜且已來卒歲諒何策

矍矍山中日茲晨已堪愛暄暄下墻陰稍稍曝軒外幸
此賓會少展體聊炙背絺衣未浣污綿褐催補碎人事
苦難給寒暑傷易代漸為啟期老頗慕靖節醉荒村惟
孤松寂寞得相對

僕隸日晏出空庭長寂然鳥雀噪禾桁牛羊散平阡人
家隔林塢崇崇上孤烟樵薪頗下嶺荷鍤亦在田諒應
愜冬煖甃若忘荒年鄰翁慰我獨沽酒酌我前饑儉慚
此意勉強盡瓦船陶然共酣暢亦各達其天

古詩三首贈張漢臣遊金陵

能詩琴

古詩出情性聲在閭巷間採之被絃歌聽者醇風還大
音既寥濶羣喙何間關燕碁混良璞楚菜藏崇簡妙理
忽有合正在不可刪秋高星河空天風吹珮環

古桐蘊至理出陽或施陰和為祥鳳鳴悲作離鵠吟高
寄周孔思清寫夷齊心子期不可鑄空有千黃金天高
九州曠百世無知音夢騎白麒麟振衣蓬萊岑

金陵南之鎮興廢滿目中青山澹無言萬里江流東高
樓朱雀橋野笛交秋風子行覽其餘彈琴送飛鴻栢臺
雲霄間貂豸我羣公為言經濟理所貴賢俊崇

石洞雜賦

廬陵羅士奇都事堇母新塗石洞山水甚佳
丙子冬其姪履貞邀同遊穿幽覓勝相與徘徊

徊者連日擇其景之
尤佳者賦詩五首

石洞

蜿蜒辭夷臯迢遞陟穹巘綿綿千萬峰蒼秀入遙見既
疲猶穿雲小息仍下阪崎嶇到祠菴高檜掛日晚人家
繞稻田窅然復平遠園廬接烟火籬落散雞犬雖知非
仙源諒亦樂農畝卜居茲未能撫景從繾綣

石人

石門何年啟疑與開闢俱上有遺世人形軀畧模糊山

空明月寒來往誰與徒吾聞晉榆石能言禎妖樞又聞
穀城公頗窺陰符書叩之了不應無乃嗔我愚

石橋

石橋跨礪礪藤花被兩涯筍輿此小憩悠然會心期崇
梯級三百未陟神先疲野人薦美蔬稍足滋渴頤嗟我
岡頭阡封固百世基純孝所形著觸目皆參竒嗟哉世
間人紛紛媿藁裡

石溪

是日與郭德方坐溪
石論文把酒忘歸

冬旱水愈涸微流行石間炯如玉璫窻屈曲相交關冷
然落幽罅隱約聞佩環擇石踞其高兀兀相對閒日晏
遂相酌持觴看青山踈雨作還止徘徊澹忘還

石泉

重巖括元氣雲竇出涌泉迸流絡廣石百尺高簾懸微
風度午日煜煜生虹烟始知窮幽討竒觀滿垓埏我友
趨奔鹿蹇裳陟其巔蹇步獨矜屣矯想為欣然瓢汲試
茶鼎庶足凌飛仙

陌上桑

燕雀不隨鳳鹿不附麟豈不出儔類各有平生親
妾家東城陌柔桑統畦春春風時物變無衣念良人高臺
王侯家鐘鼓鳴層雲回頭偶一盼通意何殷勤朝為採
桑婦暮作深宮嬪富貴非不佳誓不易賤貧此桑可變
海不變賤妾心

山家

山中烟明明山下泉曲曲書聲出疎林
楓葉半茅屋簷

角曝綿泉園曠縱雞畜寄言避世人如此亦可足

江上晚興

南堤直而崇西岸窪以折中流千片帆水日相映白翻
翻孤鷺逝迢迢高樹沒緬思沿洄人今古幾英傑晚泊
得鮮魚舉盃望新月

征夫嘆

六月征廣搖塗埃千丈高渡水波沸骨登山汗流刀對
虎攫疲馬棘荆破長囊賊來多如雲石洞穿千整鐵甲

日曬火大旗烟漲濤惡溪塞斷骨亂礫紛流膏前年過
流沙苦寒脫鬢毛風裂壯士冑雪積將軍旄人生莫作
軍寒暑相戰鏖人生莫作軍性命如蓬蒿君王方神武
狐鼠何足憐但願四郊靜微軀敢辭勞

雪後遊安成王氏端遠山園

幽園閉殘雪微紅上危枝豈不先羣芳天運如相持積
寒意澹澹初旭光離離春風來方多小忍須其時

遊王氏觀善兄弟雙清園

入門得幽池一逕窅以邃蕭蕭水竹間寂寂林壑意晴
寒樹影靜春薄柳枝細海棠如處子體弱意先麗日蒸
丹砂丸露點守宮臂少年嗜看花常恐春未至只今勝
情減得景聊一憩作詩記良遊重來非所計

春懷

連陰如病醒耿耿乍離索鐘疎山館靜花落春衣薄清
心近懶率壯事成寂寞卧看古木枝幽鳥午頻啄

夜坐二首

日入暑未解夜久涼始歸山月升漸高照見幽人衣幽
人行未已月亦轉墻西

雲行樹陰薄風過樹陰欹雲風弄清夜政爾無人知惟
聞墻根水泠泠下幽池

送劉一清教授入京

三月江水綠君行適京畿辭親古所重而使親顏怡江
北多楊花江南鶯亂飛去去事經濟歸來樹旌麾

閒居燕坐望城隅李花

春晴滿天地我獨了一室得欣或暫時積念動彌日遙
花洗宿潤姝靜耿獨立日光照素服玉氣起數尺紛紛
看花人車馬共朝夕幽意當誰言微風斷城笛

庭芷

庭芷不受俗清意耿涼袂微瀾映幽雲疎雨洗道氣日
長飽食罷坦腹花間睡閒居誰與娛賴此聊自慰

庭竹

庭竹如高人疎處更堂堂當其得勝趣豈必客主忘月

明瀉垂露危坐肺已涼閉門良亦勞有酒乃未妨

桂山堂獨坐

笙竽鬧春晴此處乃幽閒啾啾惟鳥鳴寂寂鮮人跡青
天樹光動白日瓦氣濕陰陰庭下影滿地不可執蛛絲
網虛簷懸葉如墮翼緬懷昨日心孰擬坐茲室抱迂世
同薄得景意自適窮通信所遭逍遙聊永日

對酒

落落復落落所為竟無成童丱如昨日念之為心驚城

東臉如丹秋風化高塋况持鬢間絲豈與流光爭古人
稱飲酒意欲償平生平生豈足償但可傷其情

錦雞行和王生

驥足為性禍翠羽供世儲大化役羣動顛倒無根株茲
禽亦負美自謂物不如若若漢官綬累累楚豪珠低頭
若自惜疾舞還復徐孰知羽毛累遂失山澤舒古人誇
衣繡永笑籍與朱乃知世同戒最患心自娛君子道若
鳳千仞不可拘長鳴朝陽間不學鳧鴈腴

初秋感興

秋風殊未來，林葉獨先見。譬如老將至，顏貌已潛變。娟娟庭中月，落落梁上燕。有酒誰與同，微涼髮如練。

和高方大初度日泛舟鷺渚

君詩瓠子河，剽怒奔驚湍。又如明月珠，夜室生芒寒。坐傾內法醞，不數涼州酸。手援綠綺琴，付之中郎彈。薰風四五月，驚傳滿城觀。天開白鷺嶼，蒼翠十頃寬。書堂昔所建，崔嵬集儒冠。當時擇俊髦，十艾得一蘭。恭惟先正

翁士林青琅玕筆花發天潤儕流愧中乾君詩復留壁
千載當共看人勝地逾重句好天為歡偉哉故家步真
足追邯鄲

和楊伯允

舊交存無誰故里歸似客楊君如霜木月旦所推擇齊
詩師轅公魯禮重王式天命有窮通道味無損益幽居
邃門巷花竹繚外飾朝憲研經理暮館講今昔欣欣學
子懷生意競春碧相過愧獨老白髮兀前席徘徊山澗

金匱書
卷一
勝俯仰釣遊迹無事頻往還勿使長相憶

送范主一憲郎

庸夫老丘里志士輕山川古來環轍人往往皆才賢
范君繡衣家白壁生藍田清遊半朔南征衫積濤烟
崇臺交辟剡思親理歸船吳州肯暫駐風檣傾四筵
揮毫走秋蛟吐句紆春連清霜淨江波水花寒更妍
棹謳催客發風正帆始懸翩翩鳳凰翎終當儀九天

八月十五夜懷學翁兄

癸酉

有酒不共飲君為松下人始悔生存時不獲日相親君
兒遠不歸君詩久恐湮萬世理如此停杯問蒼旻

十六夜雨邀諸姪小飲

世事不可期今宵竟踈雨豈無樽中酒終復減歡趣子
姪既滿前稍稍相笑語共言見面稀無月亦良聚燭花
翦欲盡絡緯語庭樹雲開月已高還照人歸去

寄洪守鄭鵬南四首

英英瑞世氣今在斗牛間定知古龍劍千載乃一還雨

風既順時五穀如丘山民物不疵癘朱草生堅頑願從
蘇雲卿種菜湖水灣

明公國之彥海內今誰儔使節徧南服晚乃守雄州霜
露回為春意和氣仍秋月寒西山嶠雨斷章江洲疲毗
既蘇息佳趣倘可酬

梅子非仙才高見在物先區區僅一尉去就乃偉然江
山澹無語事往隨孤烟巨省立萬馬白日大纛懸古人
不可見表章賴公賢

高士去千載危亭被崇苔湖水澹秋色野鳧時下來春
風百鳥鳴楊花滿樓臺行行事遊冶安知欽高才知公
重風化枉轍能徘徊

曉發印山道中喜晴

翳翳煙散陂沉沉雨承雷桑暗麥芒齊山園雉晨雉老
翁驅犢行丁壯各鋤耨我亦駐筍輿一訪農圃叟答言
春事深耕蒔須及候豐凶雖天數用力非可後感彼務
本言愧余尚奔走

送蕭從周赴廣東帥閩照磨

崇崇五羊城雄藩鎮南服海風吹貔貅嶺月懸大纛君
居青油幕美器瑩如玉榕葉秋雲深荔子夏雨熟寄言
慎寒暑從此奮遐躅

中秋故鄉南鄰楊氏招飲

老來歸故里百事非故情惟有山間月猶作兒時明是
時秋且半夕氣忽已清南鄰招客飲步聽危澗聲月色
酒中亂樹影盤中橫鄉曲佳節意風露白髮莖我懷豈

在酒酒觴且徐傾

盧堯道中

客枕睡方適雞鳴戒行路月落斜雲間餘光在高樹遠
村四五家朝煙澹江浦依稀橋邊人髻鬢山下塢乘車
與負戴擾擾各馳騫百代無窮期妍媸迭新故感此行
躊躇鴈聲忽橫度

寄題胡氏澗月堂二首

泠泠山中澗皎皎天上月以月照澗泉舉世無此潔月

以表我心澗以明我德秋風吹八極踞石濯華髮短瓢
吸寒光羽衣弄飛雪夢騎白鳳凰直上碧瑤闕安知世
間人咻咻乃病熱

世人不識泉等之黃泥湍世人不識月視若白瓦盤斷
篙三板船沮洳鯁鱗擊筵喧里耳曉曉聲不完嗟此
泉與月信當何人看我嘗遡其源顥白通廣寒懿彼隱
君子相從此盤桓

悼往用友人韻

百世來未已千載去不回毀器無完梓焚玉成惡灰嗟
哉已逝人忽忽誰所催琴懸久不撫闥閉終無排沉憂
鮮一適永別非暫乖崇崇園中花炯若白雪裁有酒今
不共慨然心為摧

酬邵有初

邵子國之器胸有石渠閣翩如孤鳳凰萬里不可縛文
采臨風高肯顧臯鷺惡胡為守一窻寂莫猶似昨讀書
諒有會娛親亦至樂上林多高株庶用得所託

晚春和蕭孚有二首

朝陽發微燠夕雲生層陰東池荇芽短稍覺新水深攀
翻步春風孤弄聞遙禽適此得倦坐欣然誰會心俯見
水邊影閒披竹間襟邂逅有佳致欲賞難復尋鄰酒夜
來熟邀客歸共斟客去因獨醉醉醒還自吟

幽抱鮮歡悵况此春多陰圖史揜一室蕭然門巷深
茗晝已晏時下花間禽還往既寡儔欣戚當殊心微風
動書几樹影忽在襟幸為時所棄至理得探尋東階有

美井溉飪可灌斟食飽良自愧卧聽山葉吟

芍藥

夏早衆綠翳階藹始獨開窈窕專后德深房出徘徊翠
蕤擁帝輦手擎紫霞杯夜永宮月酣餘香散蓬萊

曉行

畏熱中夜發出門人已多紛紜各有役如水爭趨河始
知昨宵夢此時方無何悠悠百年間勞逸瞬息過大星
如玉斗照我雙鬢皤東日如車輪三輶未上坡

暮憇南溪橋

黑雲高崇崇落日在雲後狀如張玄袍黃金緣其首疾
風吹參差微陷成杵白萬里青天遙數鳧下荒畝

苦旱

壬申

七月暑逾熾夜涼如高秋陰陽既罕覲時雨知難求良
苗委白莽遂茲空田疇疾風起地埃枯槁鳴蕭颼饘粥
當不具官賦何以酬卒歲無卉服誰能完續裘悵然悲
疲忙吾亦憂吾憂

八月四夜聞微雨

夢覺有奇事
浙瀝高瓦鳴
焦枯豈云潤
且欣聞雨聲
秋稻既無及
蔬麥猶可畊
側耳恐復止
願望深中情
向來春夏交
流潦高入城
秋旱理宜有
天道良難平
大鈞轉萬物
旋斡勢孔輕
仙瓢貯海水
安得盡注傾

夜聞桂香

雲月遮晦明
微涼入幽寢
推窓寂無人
老桂香可飲
百年無適意
短髮謾垂領
悠悠市道交
舉俗無管邴

寄題高氏靜山堂

太初割元氣散在八極中一靜閱今古默與天運通
草木奮霄漢神變生霆風本性固如此孰能窺其功

曉立

清晨有良悟偶此得少立雨餘溪聲近霧重林氣濕
宿禽去初盡畊者稍已出此心諒無同汨沒聊日日

初度日和蕭孚有見壽三首

前二詩詠其號蘭雪

崇崇畹中秀歲晚有佳色霜霰淒以來凌厲氣不折美

人昔滋種所貴非凡物采采懷袖間三歲香不歇尼父
為援琴一彈重魯國湘臣繼為佩食芳可絕粒豈無他
華英高世在貞德安得因長風貢之白瑤闕

天上多竒花大者可如手歲寒發竒色皎潔照宇宙美
人玉為冠侍女練為袖簪之乘風遊姝媵掩羣醜贈我
雙白璧千金不輕貿我欲酌斗酒還為美人壽風標忌
大潔顏色忌大秀何由返天宮藏之以為久

天女五色機織自開闢日至今弄寒梭軋軋猶未息筋

金定四庫全書
卷一
力散千秋鬢髮變，遙夕織成鸞鳳縑。世俗猶厭質藏之，
不復道投杼事安歇。所貴識者知尚使，光價溢歲晏風。
雪驕萬里寒鑠骨，誰能製為裘一展復三極。

和張漢英見壽

我昔三千秋，曾塞蓬萊芳。右擘方平麟，左持王母觴。夜
立通明殿，帝旁司綠章。三生習未盡，謫墮翰墨場。饑寒
如泗頰，齟齬困魯臧。賴有二三子，相從如鴈行。又持青
琅玕，壽我升我堂。我老學蝟蟄，看子爭鵬翔。愧我非韓

才期子樊與張豈有龍泉鋒不能藏尚方

玉笥山何提點建三清殿二首

笥峰雲峩峩白玉作樓觀飛來墮人間彷彿天上半只
今三千秋妙斲始一換丹霞貫觚稜白日隱其閑吹笙
集羣帝一笑視汗漫倘逢梅子真小立共談漢

始青何巍巍妙道不可說出虛還入無豈必待宮闕去
地千尺高竇棟忽以傑下視九州九泐莽如碎雪騎麟
晚北斗夜冷遺玉玦會借回仙蓑共臥山中月

庚午冬留滄州憶亡孫鳳二首

古道昔同往天寒今獨行
汝死不自悲我老難為情
死者若不悲死當勝於生
霜重草盡委山空泉自鳴
我髮既盡白我懷何由平

快意每不至傷心來自多
十五年痛哭安得鬢不皤
之子入夢想長眉雙頰酡
魂氣既何之耳側猶絃歌
月上高林楓月落幽社蘿
怪魑攫人命陰壑森蛟鼉
吾聞聖明時沴不干太和
重華不可憇千古當奈何

和涂率修中秋二首

來日不可麾去日不可招老衰既易至千載知非遙
明中天月照此佳節宵歡薄憐趣減酒滿知俗澆緬懷
區中友我我多蟬貂豈無知心人未若涂與蕭持觴不
能飲矯首窺崇霄安得挿長翮與之鳴清朝

佳節去如客茲晨已難招又如波中舟汎汎看漸遙適
此有名酒足以慰良宵旱久芷欲悴自汲頻灌澆月明
簪其英婀娜如垂貂極知非節物頗勝服菴蕭鄙性偏

嗜愛扶植愧高霄夜深風露多生意觀明朝

送王伯振憲僉

健翮隘六合逸足輕長途抱才既不羣常調安得拘王
公天下士風節今所無脫身韋布中振袂升天衢遂通
金閨籍早贊臯稷謨朝駕刷玄圃暮車息清都高馳飛
霞佩縱挹寒露壺手持使星節冰霜壓番禺經綸要大
用令德天所扶青原昔仕邦重遊真壯圖父老傾酒觴
臨分何踟躕祝公秉鈞軸四海躋唐虞

和張自翁荅婁廣文雪蓬足疾

支離妙無用鼓筴食人十王駘中分魯形廢道始入木
壽不願材齒堅以居濕倚伏本何常失馬福所集奈何
煎憂喜自滴槁竹汁至人蘊天和客沴當自戢驕陽脫
冰飲至陰謝裘襲心同造物游身豈二豎繫株拘海自
運捷者瞠不及示病學維摩要以鈍為急我生困世途
裹足掃梯級自安即卽步不效文公習君詩劇鶻羽絕
藝忘決拾又如控龍駒迎候不獲揖一讀顏為開浩歎

神物蟄再吟手不放珍過侯壁執坐憐食藿澹共鱗魚
鳳泣請君勅仙神呵護九轉粒散為六合春禎咎變噓
吸世無疵瀉人偃者皆起立

再用前韵簡諸和者

青天行萬古度三百六十東西蟻疾遲南北極出入木
金互健順水火迭燥濕萬物生其間一氣隨散集落花
炊瓊肌山菜冷槩汁雲高鵬路多蒿短鷄翼戢夏璜委
塗泥燕石或什襲涎駒駕金根天驥困隸繫嗟哉造化

理顛倒過不及少憂貧賤拘老怨歲月急舉觴共問天
升覽須幾級我文如貧女寒燭癡組習百年供蓼苦萬
事如潘拾今年金川東邂逅車笠揖每見意氣生浩然
春啟蟄明時用多士陋者猶戟執誰非彈冠喜何由向
隅泣君才豈山棲未可言絕粒屬君臯夔仕貸我喬松
吸我知君當歌天風白雲立

送嚴仁安教授二首

蕭蕭羊裘子百世餘清風聞孫頗相似志節甘固窮三

金匱要略卷之三
卷一
年青原教介直誰與同春遊望肥馬秋夢思鳴蛩貌作
衛樂癰詩比鮑謝工離別古所難風帆去如鴻

良醫有相道天下無沉痾况以醫教人濟世當益多中
仁外自見根盛宜繁柯萬物通一體流暢春風和清時
念民瘼岐扁聯禁坡勗哉勵羽翼雲漢終凌摩

和張慶遠遊青原

平生嵩恒心今日行茲原東風豈不好褰衣步青天境
空忽欲動意却仍貪前白日照八極千崖偃如眠芙蓉

遠修供鈴鐸畫不喧佛祖了何語香爐自生烟羣經過
名教乃以文字傳題詩雜好醜訥者存歲年不知自有
此登覽誰最先春橋喚飲酒一醉日可千陰陰風在麓
炯炯天映泉同來不同趣隔花亦垂鞭

和諸友登洞巖用工部龍門寺韻三首

薊城隱東峰芙蓉亘西境昔聞閻太守於此謝幻影仙
茅一丈高飛瀑六月冷悠悠遼東鶴千載一歸省

平生慕茲巖未踏巖中境及茲共賦詩自笑如捕影蓋

金匱四庫全書
卷一
臣鄉邑廢遊客姓名冷古人悲湛輩臨風還自省
志士懷四方孤生念遐境如何幽絕地不著鈴竈影買
船江口風展簾巖下冷茲遊諒非遙勝趣當暫省

和羅昌逢千葉桃

閨羸首增春朔霽久連望梅殘不留玉桃盛忽成障異
姿奪衆妍殊萼同一狀重緋雜褐襲疊綵迷下上淚明
露借光影墮日分漾紛披競年華剪刻費天匠先生被
花惱書罷時亦訪亭空畫無人山鳥立幽桁橫波繞碧

帶老樹入古像同游無前度得句有孤倡仙源誰與期
微風起衣浪

送李學錄考滿歸廬山

吾聞山房書富蓄冠天下其孫善讀之聲譽播時價偉
哉疊泉君千丈白玉瀉序庠得君重冠佩領儒雅學端
衆所敬交重事難舍木脫鷺嶼秋帆歸建江夜他日忽
相思風高雁橫野

和高師周

有序

師周吉之俊士也著名久矣於今為老成連
舉於有司不得志丙寅十月用天運苟如此
作起語為古句十五韻見寄余感其少年翰
墨相與晚節坎壈相望嘗欲和之次年正月
始能援筆而以陶語置末聯云

相牛學甯子殖貨師訐然君平隱賣卜步隲甘灌園古
人苟齟齬亦在數者間郭門秋風高老屋修竹遶席珍
門無聘懷寶意自憐擷菊飲寒澗鼓琴忘歲年故人萬

山中燈火窮青編草玄髮如雪投筆相顧嘆世好皆楚
腰僮被不見妍梧珉薦清廟滿腹空琅玕學畊憾已晚
萬事甘自捐吾聞九成樂顛倒隨陳完至音一以散誰
復窺其根卓哉吾心理本具混闢前天運苟如此相期
在聖賢

和鄧牧謙社日郊行

春風輞川花社日浣溪酒百年少曠懷四海幾佳友馬
蹄破莎泥輿影掠桑畝交深主忘賓句逸心應手流水

清統廬好山秀當牖幽尋既有會劇語不知久撫卷如
同遊不待接踵肘妙哉蓬萊音三歎得希有

遊延興寺二首

宋季寺基沒入鷺洲書院至是始復

穀芽吐堪束麥穗老未收犢迹橫滿道潢汗斷叢溝古
若草木長遺址如圓丘時清幸畊種桑柘交平疇人家
修竹間藤花俯溪流蟠石之所碍鏘然鳴玉球媿我雖
能詩所居無此幽惓然生世心易足始易求過橋不能
去小立聊悠悠

叢林翳行徑葉氣襲客襟稍深得空曠
窅然銷塵心禪房白日靜蔬花繞黃金
鳥鳴寂無人庭枝弄微陰高僧為焚香
相對兀若瘖殿宇未完舊鼓鐘初成音
孔釋本何意廢興乃相尋信知衆生累
等以一念深出門得好風行雲散遙岑

雨坐

近夏天氣濕飛雨無時來迴風卷高葉
半林白光開空齋玩造化聊與相徘徊
吟詩卒未就晴暉在庭槐

午飲

我飲不必多醉與千石同兀然睡欲醒肌膚生緜紅從
來天地間一足無儉豐未知盡此生當復可幾鐘

和羅元翁三首

白日懸高空夜乃息之海伏陰况薄蝕見者為永慨孰
知造化理持此並覆載如何崑山炎不肯少相待

青天非不高不出環之中羸縮本無迹千載乃可同變
容與失笑未有隱所從履霜早辨冰見月先知風如何

世間意往往終難窮

清風如高人爽致可以師浮游天地間匪亟亦匪遲齊
紈之所招似者或致之豈伊至妙意而或入控持如何
執熱人可熱不可思

友恭堂 為南安人作

太初賦生民落落八極中倫屬本一體初亦不擇從風
花偶相聚並美固罕逢方其竭所感自謂金石通孰知
若行路笑响猜矛鋒獨持惘惘心四顧真若窮流言病

不友謨蓋憾不恭聖賢所不齊而或一日同旭光拜稽
肅堂序如春融競難過元季角勝嗤謨嵩聽雨同夜燭
持盃坐晨鐘談經來朋徒環侍森兒童世俗吝徐行此
意何從容梅花三百里流水浮煙虹作詩寄君敬三嘆
慚高風

送艾幼玉赴南安儒教

儒官如蕨杪妄意近佳境亦知嗜習累誑俗示雋永堂
堂道心翁學者倚袖領摛詞屈鄒枚講道來華而盛世

擅塲屋金石出欬謦東家升仙子往往盡餘鼎空山三
十年華髮忽垂頂春風八極意獨立修竹影一官豈足
償跋涉壓崇嶺五陵多少年冰雪照清炯楊花鳥語亂
走馬出三省古來天地間此事從耿耿南中少人事山
水清可泳歲晚不負君梅雪三百頃

贈劉斗祥祈雨

古人敬天威吁怛待其定後來方伎多乃更以人勝矣
風一月旱閉戶窘如病江流斷橫練棹甕竭朝暝稻畦

金定四庫全書
卷一
絕鳴蛙里閉可無命劉生起驅龍造化若可令孰能使
一日春意滿丘甸勿云事邂逅期尅乃足敬羣仙居蓬
萊佩玉事清靜流霞護丹宮犴犬不聞警嗟生獨區區
豈有尺寸柄三嘆慚此心作詩以為贈

戲贈祈雨者

淵龍困彌乖甕蛄閉欲僵高人輕千金不買一餉涼墨
池片鴉濕夜靈懸曙光江河如春流昔者何所藏

追和白樂天三月三十日作

人生天地間行樂苦未畢陪歡與強笑有似名無實
新年如乍來四序忽復一池痕亂微雨簷翼語殘日青山
澹無言風花雜徐疾笑持鬢問絲為問此何物

和周伯恭山長游覺報寺

黃埃漲門衢白日照郭郭長年厭煩囂鬱若未翔廓平
生嗜靜心轉覺味不薄流光易清晏壯事落盤礴始信
山塹姿終當岩石著人情擇便適世好更美惡逸居非
不高智者笑纏縛富貴諒所欣又若垢未濯故應任所

運何者可先度向來諸名山固有一宿覺當其失俗緣
自謂如勿藥却憐心未了欲往輪四角此如霜餘水久
乃自安壑使其涉有意固已為造作乃知豪傑士多悟
匪多學恭惟平園翁至理集渾璞創寺偶一時豈以此
為託百年賢愚盡奎畫落樓閣悠悠東門瓜寂寂華表
鶴風流在斯人淪浹心所著夕陽草樹空客子散腰脚
羊杜遺峴山松紹謾河朔人生幾泡夢奚用苦酌酢虛
名等賣瓜賣者不自嚼東流澹連雲青山去如幕登高

亦能賦有酒胡不樂放懷天地間與彼俱調謔清風從
何來我憤岸未落詩成豈不佳衆樂襍賈鐸孔佛將無
同獨愧此言約

寄題吉水程州判勤有堂

讀書如農功播耨無休時春雨困鋤鑄薰風走臺緇秋
熟償所願忝授高京坻東家不昏勞飲酒隨市兒室空
立四壁衆飽已獨饑始知貧富權非盡天所為筋骸我
所有墮廢誠非宜六經具理道諸史垂興衰修身與治

國途軌坦且夷講切得其要高可聖賢追功名特餘事
記問非所師但使本根茂華實當滿枝退之以利誘不
免後世訛英英程別駕龔卓讓設施作堂扁勤有燈火
喧吾伊頗聞郎君佳過眼無前疑胸蟠五千卷下筆蛟
龍馳勗哉樹斯文千載以為期

贈蕭以能義惠

義財古所難史傳希以潤其間垂一
二千載事若揭蕭君詩禮家貲蓄本涼劣
獨懷濟世心汲汲甚饑渴江橋

橫長虹輿步無病涉有粟濟歲饑有薪救冬雪親親與
仁民隆殺各有節東家田連阡鐘鼓鳴繡闥春游飾燕
駉夜宴圍趙瑟族姻半顛連肝膽迴楚越况能念閭里
濡响誓俱活嗟哉蕭君賢財出鷺股割絕甘不待多為
惠貴當厄丈夫志及民常欲俟顯達歲月忽蹉跎白雪
颯秋髮誰能持此詩誦與腰金客

五日和邵有初

節謝客稍稀晝永意彌獨瀟瀟花間雨林光弄遙綠緬

懷獨醒人一往不可復素心諒難得且酌樽中醪

白木槿

重臺每開
踰十日

數花出籬援耿耿照夜闌月寒客獨起恍若山雨殘天
風冷然來坐久身欲翰夢酌瓊宮漿薦以雕玉盤羣妃
霓裳冷天嬌環青鸞世言朝暮落耐此十日看始知潔
白姿頗勝施朱丹大鈞縱萬物爾本羞蕙蘭同類偶自
別亦復得賞嘆勗哉勵貞節相期在歲寒

村墅曉起

秋晨雨初歇草木涼蕭蕭墻桂吐微香
架荆揚其條物意正自適而我亦逍遙
物不怨閒棄我豈傷寂寥物我樂天運
可長亦可消

荷花莊獨步

庚午

少年所寓留今視為故里鄰翁不知老
笑我老如此徘徊阡畝間感會獨在已
雨足秋禾肥平偃如席几雞豚散原隴
菰芋繞池水饑饉稍已忘及此樂生理
日暮樵未歸炊烟數家起

又舊與彭士奇羅
君遜皆寓此

昔與二三友周回此田疇中歲風雨散茲游誰與儔望
山漸適意得樹亦少休峯回西風長吹我駝毛裘登高
遂遐矚一粟託九州去住定有契欣戚焉足留戲攀西
祠花下濯北澗流

八月十四夜聽雨

佳節隔一日連陰雨凝秋不知及明夕當可見月不陰
陽迭相乘萬古理可求明月豈我遠美酒宜預謀

田家咏

田家務生理機車夜紛然少多有程度夜久始安眠
鷄鳴復競起照室松明懸日日不遑息不飽粥與饘
自言多假貸火宅百慮煎大家急索逋往往乘豐年
豐年固可喜可喜亦可憐

又

日出山東明荷鋤事耕作日入山西昏持斧斲松柞
但取朝夕給不憾筋力弱秋棉吐圃花南市酒可博相攜

各有徒稍倦亦暫樂豈必無機心嗜欲良已薄

癸酉元日

元日解纒續氣候何過暄墻東有繁梅清曉蜂喧喧高
齋門晝闕靜坐觀遙天瓶英炯如玉相對俱無言

元日賦紅梅

紅梅本遲暮冬暖遂爭先亂蕤額黃澹細蘄丹砂圓雖
加點染工風致終自然懷哉生意具欲折還復憐物理
且如此吾生寧怨天

石菖蒲

盆池有靈苗石罅忘偏仄微根亂繁絲疎葉散纖碧苔
莓封巉岩沙水明的皜所貴含貞姿終然傲蒼色道人
勤養護黃悴輒翦剔常與貝葉書珍愛同几格豫樟蟠
青冥風雨作霹靂小大固爾殊賦分焉得易相期喬松
交歲晚堅九節

又

始從山中來遂置憲几間稍依勺水潤猶託怪石頑竅

沙極淺白坳苔上微斑貞靜固可愛長茂良已艱幸與
好修者同此一室閒月寒垂珠露玄津自根還燈火親
已晚庶用凝顏顏

贈興國石印歐陽明翁

淳樸既已散大年良亦稀唯聞南陽山食菊多耄耆又
聞商顏老頡頏霜鬚眉時與蓬萊仙騎鹿扶桑池元氣
有鍾會昔聞今見之崇崇鬱孤間文石如印竒君家擅
其秀兄弟皆期頤曾玄羅高堂彩服光陸離南燈北窻

月千丈喧吾伊聖朝重耆德坊表生光輝我欲往相從
共食瓊田芝笑問廣成子重逢復何期

賦興國王氏梅窓

天地有清氣散作梅花風梅花有竒致妙在窓月中金
莖淡午夜清霜飛太空道人起危坐八面虛璽瓏橫斜
落瘦影妙筆由天工玩之了無言意與太極同我聞三
槐家種之在瑤宮千載有佳句何異孤山翁

八月十日蕭孚有邀同蕭州判安國諸賢集德

元寺鳳山繼飲熊氏園

應俗妨良游茲行偶能遂初逢梵寺靜繼得儒宮邃晚
芳被深徑寂歷含野意游鱗動微瀾幽鳥下荒砌怡然
挹蕭爽適此念興廢後游誰與期得酒且復醉

諸賢皆和遂再用韻

夏華既云謝秋實良已遂幽行歷故墟一逕入深邃感
舊多嬰懷得勝亦會意微風來高林小坐列苔砌攀覽
景彌佳衰倦興先廢路逢隴上人正復可同醉

旦坐對客

夜久聽寒雨坐來星滿天
重霧被原野漫漫白于氈
五更雨復集急灑驚客眠
豈意今日霽旭暎如黃綿
相對庭樹下滿傾藥玉船
萬事且勿慮蒼天工轉旋

曉行

星明天宇迴山驛鼓初發行
人稍已動露氣漫埜白
方塘浸道隅荒荒似寒月
日出炊烟橫鷄聲隔林樾

和臨江饒自然夜坐

庭樹秋月高危葉光欲墮孤蛩感涼氣唧唧稍近坐鄰
家弄機杼微燈出窻破寢齋生新苔禪裯揜關卧

再用前韻贊饒所作山水圖

高人發秘思妙景自天墮蕭蕭山水間草樹環四坐雲
歸野色靜泉落巖光破平生慕清游展轉面壁卧

蕭字有諸君見過貽詩復用饒韻二首

閉門無來人秋晚柿葉墮時從林下行還向草間坐車
馬忽枉顧蕭蕭踏苔破客去明月上山禽喧夕卧

子雲事規矩歲晚高閣墮何如馬長卿都騎傾四
坐吾生兩相忘寂寞茆屋破陶然盃酒間竹牀飽
秋卧

霰雪和彭經歷琦初庚午

歲饑瓜地荒老病卧玄晏閉門三日雪飛霰相稌亂飄
空乍鳴屋穿隙已在案載途積愈高集水凝不泮山寒
消久暄玉潤蘇亢旱頗疑湘蛟泣珠璣夜紛散又如洛
倉破白粲接原岸柔條壓既低高木擎欲斷體圓工簸

弄地遠迷界限我生事嘲笑寒餓不可遠坐憫民瘼深
誰與覓醫緩救荒既不預應卒自無筭古稱兆豐年至
此可三嘆

時歲將除再用韻和之

別歲夜卧遲怯寒朝起晏黃雲低不動白霰下愈亂鳴
簷鏘若珮積地厚成案遇堅勢屢躍得暖濕先泮嚴沍
阻春生蕭條助人旱紛如撞斗破疾若搏沙散朽株發
英華深谷變陵岸先生懶斫路門外人迹斷作詩無雕

鏤白戰安可限空山斲黃精微此命難遣少年喜映書
老大悔儒緩豪門方飲羔觴急不可算安知負薪者道
旁拊膺嘆

和邵有初同飲熊氏小園

客佳不必多地近得頻往極知後花時聊復縱心賞樹
深路欲盡林缺天忽敞坐久飛雨來黑雲湧竒嶂清風
襟笑語共作金石響尚疑有餘韻隱隱在蓬萊豆觴稍
狼藉賓主各酣暢安知牆外人

謂牆外
叢塚也

千載落埃塊生

時諒自謀局促戒游蕩百營有醜妍一盡無老壯何為
苦不飲勞身入羈鞅

贈青田道人

軒軒青田霍萬里在羽翰曾從蘇丁去復此來人寰相
望三千年戛然鳴空山蓬萊雲戔戔夜永風月寒天街
方九軌要爾駮笙鸞胡為鷺與鴛飽食青琅玕嗟爾有
仙才欲往諒不難

和張尚德憲郎

君詩如長江浩浩積渚滙縱之瀉千里所過不可界又
如百貨集光彩照闐闐銛銛干莫鋒溫潤琚瑀佩變化
發令姿富博駭羣昧鬱孤留十日山水各獻態振衣千
仞顛磬欬蒼秋籟涉溪螺斗驚窺谷杞根吠羣峰如故
人拄杖靜相對盡追坡仙游踏破山浪翠吟工壓木客
氣正失垣魅知君青雲士勝迹猶所愛經濟滿胸中領
覽暫方外不同牛山登流涕感謝代五羊屹霜臺掾檄
促今迨懸知衆器陳政復待殷鼎古來成功人所貴志

慷慨文奎動遐極
爽氣破炎藹
九月霜露嚴
整駕俶高邁
便同南溟鵬
俯謝蜩鷃類

和張子明學錄三首

比竹無至情
焦桐無餘滋
和音發清潤
婉變令人思
竒蕩傾衆目
矯然出藩籬
物理終有合
憾無音與姿

白雲豈不潔
或謂無其芳
斗柄豈不高
或謂難挹漿
高潔自皦皦
倜儻驚堂堂
倚杖久無言
飛雲度橫塘

張君北方學
易道究微淨
長才譬騏驥
跼蹐果下徑
作

亭依曾城傲睨有餘興芳草皆會心飛雲亦成咏

再和三首

滔滔九江流南紀胥潤滋禹功之所濟萬世可以思觀
其赴海心誰能與藩籬志士諒不殊卓哉經濟姿

微露淡秋色佳植崇時芳采之遺所思寄情如饋漿美
人冰雪姿宜置白玉堂清風忽徐來文漪徧方塘

文江挹東山秋水綠逾淨崇崇聖人宮飛橋被衢徑多
士欣所慕遊覽足高興悠悠在泮飲炯炯浴沂咏

臨江傳用賓以詩見贄并貽端石用韵為謝

幽幽端溪石來自佳人持相待三千年所得非所期
春風琢粹質秋泉湧寒滋文增李杜壯書助鍾王宜聞昔
初取時千夫下岩陲堅錐啟石礦利刀斬荆藜鑄鏤后
土闕百醜得一奇點若魯鳴美伏如虞鷄雌宜登白玉
堂黃麻照春姿發揮四海治潤洽萬姓私謨布禹臯懿
誥逸周召規胡為到窮谷一落不可追饑吟臘雪凍病
哦春日遲蹇蹇涓滴潤不能霑硯涓生從嘉興學江漢

驅文詞鉅冊博羣理三讀為嘆咨研磨不自寶乃以贈
所知愧我無所用藏之如鎮圭

山礬

叢叢亂玉糝藿藿會金縷山明風日醉香入行人肌塌
然薪樸間時至有此竒我欲畧下體持種蓬萊池美人
天上來萬一充調饑

瑞香

蘄蘄丁香角澹澹水沉味月映赤瑛色日照紫煙氣神

農不知名但道天下瑞夜寒擷其英綴作飛霞佩願佩
君子身華滋長不悴

雨晴門外獨立

東風瞰我幃啼鳥發我興出門更無人惟有青山靜
琤石水鳴忽洗人世聽它日豈不來邂逅乃復勝

暮坐

悄悄若有懷悠悠竟無適春深墻英落失我庭下石
颯然一雨止坐見萬瓦濕風急寺鐘盡惆悵成暝色

秋夜

閱書意適倦仰見檐月明孤燈秋夜客獨聽藥鼎聲廢
吟聊養病處寂更生情還看手中扇持此感平生

客懷

去住兩無定幽獨誰為開秋齋朝雨濕饑禽獨下來繁
柯委悴葉廢書振新埃懷安誠可適終當何所裁

開歲三日池上小立

今日天氣暖已似三月春終冬雨雪少風起輒生塵道

金匱要略卷一
卷一
人幽行倦樹下一正巾流水見兩鬢一笑嘆我身日光
墮木影滿沼黃金鱗白雲行其間游條動籟淪偶然景
與遇亦足適吾真人生會心處何必窮其濱芸芸黃埃
中勿語行道人

新晴偶步

宿雨衆卉濕簇簇新黃稠蜂聲花氣暖鳥語林光幽戲
拈碧桃片試放清池溝翩翩亂眼急既礙還復流雖云
玩光景聊復寬鬱憂不知玄都子會意有此不

山家阻雨得晴出郊

山家半月留坐待雨聲住東風入我簷領客村東去晴
光著天壤生意欲飛舞野禽拂清漣襟花滿幽樹回首
西岡麥十里綠如雨新年今日佳復足濟勝具兒時所
經過彷彿猶可覩穿深過亂峰意與仙境遇白雲行洞
口枯木記歸路安知山間人不訝予何故

初見白髮

本無大憂患何為早見及人言汝多知我亦怪弱質崑

崙日夜運春雨浸雲澤本不與相期安能限其色門前
晞朝陽遠映江柳黑數根偶如此何用更拔摘待渠三
千丈更好照庭雪

早行值雨

瀕江夜不寐舟客聲可怪颼颼篁竹動沙水輒澎湃晨
征路泱泱春泥踏行蟹江空霧連山隔手已為海古木
夾道遶宿雨驚我蓋我行亦何為益信勞大塊平生青
藜杖至此始足賴天地稍嚮明雲來復如黛平田萬白

頃欲攫不可待竒變固可觀
跋涉良足慨作詩寄吾友
要使心目會何時終南山
卧聽響窻外

寄鍾祥叔

三歲祇等閒一日正難度
向來會心處邂逅誰得語
山深百鳥鳴想見吟益苦
君才極落落槃會過齊楚
寒機變鬢髮誓不輕一顧
坐令車馬熱裋褐尊霧組
丈夫志經綸寄食等傭雇
紛紛適獻笑得失豈相補
春雨漲空江暮雲帶平樹
悵然良晤期且寄餘春賦

園亭夜飲

酒酣愛花香三嗅
冷欲既春風心骨軟
狂過發永欸却
念坐間人誰共此時意

池亭即景

小亭掃芳畫幽鳥語初暖
坐倚階草柔行避徑條短
水光與花影歷歷明不亂
疾風忽翻林落紅半池滿

午坐

今日頗送客兀坐心未定
午倦睡適來鳥語偏滿聽
昏

昏半人世隔屋喧笑競惱我彼不期閱動正在靜清風
白晝永庭影亂復正悠悠無與言起步林東逕

援筆

落日池上飲荷花醉于人清風吹人衣玉笙徹秋旻酒
酣起絕叫遊子不念貧平生阮嗣宗定勝石季倫

呈須溪劉先生二首

仙人三山來袖有五尺琴綠尾龍門植朱絲軒轅音攜
之魯謁舜三奏鳳舞庭風高天路斷歸見崑崙青起視

金定四庫全書
卷一
八極間琅琅成孤鳴綠海凝不動白日回夜明時遠地
亦失猶使天下傾但憾無子期彼直樂其名

六合白日盡閉門讀仙書骨凡俗亦重三嘆空若
無朝芝與暮石憂樂病益癯坐聞安期生散藥行
八區飛霞貫紫帳天風吹流蘇青童笑丸丹庭下
白玉壺念此千載事咫尺雲中居奈何歲月忽欲
往終慚愚

賦小松樹

何時始移根今日已映坐沐露欲五寸出草先幾個林
深帶宿潤滑滑垂白唾欣然千丈意鬱勃不可挫我無
定居地此計恐成蹉他年欲待陰日月當已過桑麻要
生養文字迫寒餓柳傳未可學范書真足課如何抱空
踈矧復習痴惰嗜飲此山水五歲飽高卧君看重來時
風雨夜相和

曉起

曉街千動發秋房獨酣寢紅日照松端鳥雀鳴相應世

金匱山房詩集 卷一
味澹不生道心方暫領擾擾塵埃間老我不自省

游崇福寺

我齋不盈丈面壁兀若頑出門天地濶曠如脫牢關青
童迎相揖笑報山僧還娑娑三四客竟日長松間中心
定何如氣象無此閒誰當千載後如我坐茲山

暮雨

層宇晴氣濁靄然生浮雲夕風入客體暄寒倏以分坐
愛墻西木微雨偏可聞松苗潤當時藥草秀已芸還因

春務迫愧我道未勤

和蕭安國浴罷見寄

烈日晒書牖微風懷舞雩
溯溪得盤渦日覺泉竇枯
馳暉貫水石交曲如金鋪
從容雖竟日忽忽若有驅
始知羈旅中一快終非娛
此山豈有契久住真慵愚
年年見華黍頗熟田間夫
人生亦底用丈室飯一盂
崔嵬七尺影壯矣將奚圖
東行有問我多病同相如

偶題

金定四庫全書
卷一
客懷無可著日日來看花丈夫不自食同里為天涯風
微天無雲日落人歸家聊題今日心寄爾東門鴉

七夕二首

斜月隱雲裏明河橫樓東鱗鱗萬瓦靜天高樹無
風衆星炯不動靈鵲從何通遙知積氣上六合方
無窮十年欲學道憂樂填我胸胡為彼玉人世念
亦未空

牽牛紫駕衣織女白玉容一水清可涉非時寧敢從窮

年弄機杼縫成合歡宮綫掛牛之角樞倚虛之東停車
俯八極白草連秋風勿嗔會合少天地以相終

偶行

東阡出南陌天氣近佳節日晚春衣翻崇阿微風發飄
然起長懷矯首萬象列大江日夜流天際生新月

把鏡

今年復明年天地終如此山中有畸人頗怨歲月逝梅
花盛已落桃李欲相媚愁來把鏡看白髮早三四

和蕭天叙山行

臨水偶成趣朋來如相期人家山磴隈往覓漿水遲清
樾抱石橋行旅坐支頤交交雙鳴禽見客已驚移

暮齋

客去簷雀噪高齋久清立疎雨無行人煙掩夕炊濕前
園蘼蕪哀東鄰日夜織同門信不至鴻雁滿江澤

別劉文甫少府

崑崙八極間白日去未已堂堂梅溪翁衆器古壘洗向

來恨不見既見會乃幾平生慕前修屢飭不自起始愧
古人學不憚走千里歲暮高館寒殘雪尚可履公歸我
亦去後會未得擬請參在家禪願吸西江水

先母諱日痛不可言二詩寄家兄學翁

今朝亦何朝驚骨淚如霰嗟哉十五年每歲少親奠塋
墳長春莽當日本草窻生存未能養臨歿不及見如何
一杯土展轉日如電乾坤有盡期此事不可念前年理
舊衣猶是雪寒線生子亦何為循髮青欲變寫哀寄吾

金史四庫全書
卷一
兄行雲滿郊甸

又

斂形亦為孝擇燥何必福因循若有待萬死罪莫贖春
來凜可痛逸篋過新竹况堪分百念來忽去亦儵吾兒
寄他巢未能念姓族君兒慧而病近復聞廢讀林烟午
未起多雨潦入屋回首同氣親參差多可哭幸今得尺
地此事決秋菊

彭琦初作影調義因復戲作

出門違所親百里變山水東西與南北舉頭惟見爾爾
何無一事相逐若相喜爾從扶桑來又欲催我起長途
見爾落映我走如鬼嗟哉爾不死我苦未可已曩者郭
門人怨爾不少止奈爾頗痴頑萬古終如此

羲荅影

我生天地間與爾皆有役我不與爾謀爾豈願我息終
風十日霾知爾怨已極孟冬夜差永寒燭慘相索爾如
生華屋玉面不我識爾如息樂丘與爾永相隔奈何爾

不願爾願或不得是機偶相遭萬古亦戲劇

文江同諸公晚步

意登何須高一覽萬象足大江繞孤縣草木入滙瀆東
山走虬龍出沒獻所伏晚晴天氣正新月映江淥徘徊
數過舟上下有遲速是時清霜初木落秔稻熟平田見
溝塍荒野縱牛牧天時既已豐世運或可復陋邦亦何
為巨鎮今所獨遙聞郢都鷹郡邑所側目西鄉瞰官途
亦或理逃屋苟安倘可期未敢責深欲

有行

昔我行高原黍稷青茫茫及茲涉秋雨晚稻亦已黃東
峯出晴日西嶺陰不常草木凝正色英華欲歸藏嗟言
一歲間奔走何所將驚風盛弓繳鴻鵠高其翔志士念
四海時危懷故鄉蓬蒿萬萬偪側乾坤迴其綱

感興二首

窻空見高樹新葉一寸碧春色已如此十日曾不出去
年出山遲臨水見秧刺昨因農圃言偶念丘壠迹豈無

躬耕資懶性乃弗力便當歸去來家人為炊秣

測測衣尚薄高齋近寒食微雨濕飛甍行雲弄晚
色墻英困未舒庭綠日無迹芳年遞相逢胡乃長
為客人生天倫樂富貴不與易念歸乃不歸此興
為誰役

對月

月明坊馬秣夜永樓樂悲葉光如垂露宿鳥屢翻枝柴
門步復立萬憾集此時饑驅明當別木末疎星移

雨後

微鐘生暝色
遠舍春正急
空檐暮雨歇
偶然有餘滴
危坐久無言
童子了不識

摇摇田中草

摇摇田中草
靡靡何足矜
歲久蕩春暉
丁男未歸耕
旭日野鶩來
飛舞相踐凌
鶩飽去不念
草性隨自榮

青青橋邊柳

青青橋邊柳
移植東家門
但得歲歲好
那能懷本根
游

子年貌往踟躕武昌春所思在舊物微木非足存

新晴

春晴吾故人兩月一見之先生坐不出猶如雨中痴案
銅浸素藹幽貞淡相持倘得造化心春色正在茲

山墅初冬二首

甲戌

鄰春五更動機杼響俱發薄霜厲層宇天西輾孤
月驛馬嘶不已壁蛩鳴乍歇故人期不來山莊多
落葉

少日鮮歡趣老境多孤悵山墅寒掩關蒼苔生庭中濟
世久已晚著書懶無工惟應學王生作文稱酒功

送于伯尚學錄滿歸分題賦尊經閣

堂堂廬陵學傑閣凌青冥縹帙充屋棟祥光夜馳霆子
史豈不多所尊在聖經聖人制作意百世昭日星易以
開造化詩以勗觀典禮以垂世範書以底民寧春秋謹
筆削亂賊懼斧刑子弟事其長臣庶尊朝廷仁義飽穀
粟網常明渭涇天地列河岱日月行海濱大哉斯閣間

萬理為一庭，巍峩在人目。嚴敬生中局，于君三年錄。口
吟披不停，譬如飲醇酒。心醉未肯醒，薰風吹歸棹。明日
指劍亭，自此講天祿。更照青藜青。

夏初城西樓讌集

輕陰翳萬屋，夕陽在遙山。空濛亂紫翠，變化頃刻間。憑
虛一以眺，衆景何斑斑。薨棟散高下，岡巒如斷環。孤檣
出宵暖，飛鳥時去還。客佳飲逾多，感此良會艱。瞠言名
利徒，誰能同此閒。勢集易傲俗，有求多俛顏。悅已嫉來

式違時傷廢班百年一丘墟勞生共塵寰願與王子喬
騎鳳相追攀

初夏書懷

永日賓轍稀危坐頗自佳幽禽下書几晚花獨當堦簡
策散不理焚香破孤懷猶嫌市聲聞移牀息南齋

蕭孚有以左耳陶瓶對客煎茶名快媳婦坐間
為賦十六韻

南中土埴堅妙器出陶火控搏雅以靜整削平不頗渾

淪象瓜團短小類橘顆粵椰實盡剝蜀芋膚未剝啄如
柄揭西耳若柳生左油滋飾外鍛灰盆增下裏高齋奉
煎烹湯勢疾軒簸狹束蟹眼高薄逼車聲播俄頃潤渴
喉巧婦愧其惰乃知轉旋工政要傾酌安主翁嗜吟詩
佳客時滿座呼童汲清深淪雪澆磊砢急需既能應閒
棄無不可東家重函鼎菌蠢腹徒果美人預為齏常恐
遲及禍何如且小用慎勿謂么麼

賦袁州鍾清卿清露軒二首

善琴

虞舜既已遠仲尼去不還寥寥古桐音流落歸空
山之子子期後千載手可攀華軒湛清夜露光在
林間一彈月當戶鸞鶴號清寒再彈風度水魚龍
奮神奸起嚙仙掌液振衣上天關人間正酣睡從
古聽者難

零陵有竒器升降閔世道聖人方在治澗澗照青昊飛
仙千仞端探飲養其實夜寒抱瑤琴騎鳳弄華顛獨立
天地間萬古以不老

題劉氏芳洲

朝種百畹蘭暮種千樹芷芊綿十里間環之以流水春
風弄柔艸秋露濕芒履雲來值捲簾月上見隱几馨香
久已忘采佩聊自喜世人服菰艾污穢寧在已悠悠千
載心相望惟屈子

燕二山同知請雨中華隨應四首

峩峩廬山雲骨琢天上雪試之虞舜朝霄漢慶五色文
江六月旱千里受其德千里未足多中有天下澤

堂堂中華峯秀出雲靄外松花長道氣燈葉幻天界崔
嵬三仙人厭世不肯浼一笑從公游為公作豐歲

刑鷲竟何為擊蜴乃類戲古人決一獄自可回天意賢
哉別駕公展治劇勞瘁此雨當歸誰作亭公自記

豆肥悴為萁稻秀焦欲槁溝車鳴鳴田笠晒杲杲郡
公吁請雨一雨萬物好邦民歌公賜此賜等大造

九日偶賦三首

古人愛時序行樂苦未滿心期諒多廢人世良非短富

貴首不回貧賤笑亦罕九日固自佳淒涼滯孤館

我性不藏事急吐如建瓴世人務寬厚叩意如堅城豈
不共談笑何以同其情秋風一盃酒千載無淵明
人生所涉閱散漫如天風去之即陳迹好惡俱已空誰
能為石交歲晚心亦同道旁得遺金一揖顏色充

贈丹士

大哉方寸春可以毓天地偶其一念私手足且痿痺故
當先自治無復秦越異達心世良醫未達不肯置如泉

方出竇必遂到海勢神丸構元氣鼎火力千歲謾謾市
井中光塵入游戲豈非壺中公欲出世間世嗟哉閭閻
子寒熱劇攻殪壯兒呻摯肘老病喘秋肺從君訪十丹
萬一施七劑

印岡道中

小溪隱曲折青山走崔嵬向來富貴人埋沒俱烟埃壞
屋數十家高墻半莓苔少年所經覽白首心愈衰土人
既消歇郡人爭主裁勢力有大小彼此迭往來博哉宇

金少四
卷一
宙間千古同一哈

送鞏如安迎母關中

疾風厲八極之子行奉親昔別兒未言兒今華髮新天
寒渭波白雨旭秦樹春路花照車慙桑雉飛雉晨促歌
鼓趙瑟醜酒烹猩唇盡招平生友往候湖之津

八月十四夜陰

階蘭葉猶吐庭桂芳乍歇夜涼集佳話幸有二三客杯
盤雖草草聊以先令節矯首浮雲間遞隱霧微白不惜

今宵陰共看明夜月

和友人端居遣懷

嗜書固成痴愛馬亦成癖
塞垣馳風朝山牖映雪夕黃
埃髀盡消細字髮變碧
功名諒何補歲月良不適
始知苦心人不特貧賤迫

送吳提舉歸九江

承平盛同文北學及楚甸
多聞宿至理羸質出高辯
百年兵草餘此士可幾見
翩翩不我留梅雨颯歸扇
山城

青嶂高風帆疾鶻箭寄語匡廬峯未老須一面

哭袁從義

別君未兩月傳訃始疑妄童來得真報失嘆淚自放歸
城弔君兒內慘刮肝臟君廬乃未定欲哭無所訪念昔
客君家我弱君始壯山窓古衣冠談論瀉春漲三峯競
竒秀清絕行雁蕩座客多英豪車笠填里巷廢馬騰
驕嘶樓姬啣清唱鼓鐘宣朝晡昌運積饋釀夜詩涸鴟
硯朝酒發鵝盜君尤嗜迂濶又手折詞匠扣扉報警聯

急吐如技癢約試古洪州五月舟已榜蹉跎我興盡君
志乃獨亢霜臺肅縉紳閣闥排榮鬣落筆風霆生四座
色驚悵文書上省曹吏黠歲月曠復以茂異聞州里許
其當才高命苦竒選近身已喪知君豈有待獨可念趣

尚前年從謹兄千里殞茅瘴賫志不得年追憶有餘愴
君今復繼亡如山刻危嶂死生固有數壑經乃相望福
善理則那造物疑可謗知心幾何人而况日泉壤君鬼
既奠居麻雪始垂帳屬我病山曠乏劣積衰狀束芻付

金定四庫全書
卷一
兒輩含淒黯東向青春如昨日白髮餘輩行悠悠酒壚
荒寂寂鄰笛亮秋高風動木夜永月窺幌三嘆平生魂
淒其隔風浪

五言絕

正心齋

以下五詠為
戴正傳作

人心應萬事最戒與俱往所以古聖賢但教約其放

承志齋

古人請所與于事本為細苟能充此心何往非順志

自家意

萬物有生意欣欣同化鈞始知人心仁元與天地春

南江之南

將父水之南故家在其北依依南北情一水安可隔

十竹

高人貴不羣種竹只種十我思伯夷風不妨更孤立

白木槿

潔比何郎白淨如寶奩慙秋風竹籬暹日暮道人庵

又

童童綠萼靚炯炯瑤英削天寒門半掩賦命無乃薄

假寐

梅援幽鳥鳴山客睡初起空齋晝無人寒日在書几

有候

山鳥聲百變之子殊未回不如墻西日澗灑向人來

日夕

日夕同騁望行雲徧天涯歸來獨坐久踈雨響南齋

題清溪僧所藏枯林四畫

蘭二首

纈花得雨茁劍葉當風披道人采葯去誰與同幽期
昔從楚皋見今藝梵王家諒應面壁禪無復生心花

蒲萄二首

秋藤逸危架勢重疑欲委高齋明月上顆顆如懸水
枯葉展大蝶低枝屈長虬露寒壓成酒無夢到涼州

山居即事四首

井口橘依塹井頭桃覆屋山家秋日晏閉門數修竹
村墅薄生理門靜如招提柿葉大如扇滿地無人題
竹架已藏扇陶瓶時煮茶疎疎十日雨開盡黃葵花
靜意便野性新涼足高寢山屋夜雨來倚枕談歲稔

春陰二絕

桃李生寒色連陰未著鶯殷勤夜來雨供我聽溪聲
短短麥苗遠泠泠溝水清北山晴雨裏一樹李花明

夜雨獨坐

容膝九年壁陪人三斗埃小窓微冷夜掩卷雨頻來

山行

墻角袂生波山風吹面醜桃花紅欲活愛殺可如何

元日

庭燭懸春粟瓶梅有臘花兒童能拜跪還認客為家

除日

盤蒿留雪味槽酒入春姿斜日梅梢意年年只獨知

耳鳴三日不止

本非作勞者無奈聒吾神節奏真天樂何從舉似人
新春二首

舊雨來人斷新年遠夢多朝朝庭下樹看爾欲婆娑
淑氣已著物晴雲時弄陰隴梅坡麥外別自有傷心

暮晴

忽見今宵月那無久客情寺鐘遲欲盡村火遠猶明

春雨曉坐

衆木蔽春塘花落如墮鳥山莊苔滿階久雨來人少

欽定四庫全書

桂隱詩集卷一